

●

●

●

●

●

●

●

●

●

種
痘
心
法

朱奕梁 撰

中
華
書
局

種痘心法

叢書集成初編所選借月山
房彙鈔及澤古齋重鈔皆收
有此書且同一版本借月在
先故據以影印

種痘心法序

種痘一科昉乎有宋

御纂醫宗金鑑言其要矣至於方法多出於口授心傳
或未備載余幼好岐黃之學廣搜典籍博訪高明間有
一得未敢自信誠以醫雖小道實寄生死自非洞垣斷
不可漫爲嘗試也比遇明師授以種痘之訣析疑辨異
檢訛訂謬得其要領挾其精微閱歷有年頗有成效嘗
欲錄爲一編以備參考每不獲暇茲遊大梁客中暇日
條列論方以爲一科詳愼簡核可以積德可以養生不

敢自私公諸同好願體天地好生之心勿懷一身營私
之念雖無當於大方或有助於幼科也朱奕梁識

種痘心法

國朝朱奕梁撰

論痘源流

天運自北而南地氣自南而北痘疹之源本於父母媾精時慾火藏於嬰孩之命門所謂先天之毒是也上古俗厚人龐蓋無此患迨東漢馬伏波征交趾南方濕熱與相火煽動遂染痘瘡傳入中原流毒嬰孩千百餘年無可預挽宋王文正公之父生子數患痘殤後得文正公旦百計千方預求挽護廣詢醫巫力行善事感天母

降凡神人授術慶衍化流而種痘之法遂傳於世由今推之蓋先天之毒伏於命門外無所感原靜而不動至氣運用事保攝失宜則比戶連村一人乍起傳染殆遍所以少陰司天在泉之歲痘症尤多其有飲食驚恐傷於內風寒跌撲傷於外者遇之輒殆此非痘之殺人良由多症之夾攻勢不支也若夫種痘則飢飽預節溫涼預調神完氣固時疫未作以馴粹之苗引平和之毒是以計日而發應候而收萬全無害譬諸渡江河衝風冒浪縱巨艦未免沉覆之虞而風恬浪靜雖小艇亦克濟

於洪流詎得謂人事不能勝天盡委諸氣運也哉

審時熟苗

種痘之派有二其一爲湖州派其法選時痘之極順者取其痂以爲苗是名時苗種出之痘稀密不常時或有失起於秋分之後停止於小滿之前蓋圖利之所爲非仁人之心也其一爲松江派其法專用種痘之痂以爲苗是名熟苗種出之痘稀密視乎胎毒之輕重輕者不過數顆而毒已盡卽重者亦不過二三百顆從無通癩合眼諸苦雖酷暑嚴寒並無妨礙良由其苗傳種愈久

則藥力之提拔愈清人工之選練愈熟火毒汰盡精氣獨存所以萬全而無患也若時苗能連種七次精加選鍊卽爲熟苗不可不知

選苗

茄不拘大小圓厚色紫明徹無昏濁氣者佳頭面爲上身手爲次腰下至足又其次皆可用惟手心足底紅唇無毫髮處及天庭眉心鼻尖人中地閣咽喉枕骨當胸乳尖當臍背脊各正中等處並前後陰器者俱不可用

收苗

收苗回漿結茄色老四圍起白衣用指甲輕輕挑起揭取爲上脫下拾取者爲次況脫下遺失尋覓甚難摠宜揭取貴乎恰好太早則傷疤太遲則無及

貯苗

貯苗先選合式之茄用指撚淨浮汚預備乾潔竹紙包好寫明日月并孩子姓名以便臨用揀取包不宜用紅礬紙恐損苗故也宜於近身少佩片時以去茄中潮氣則不蒸霉卽藏於乾淨磁瓶內置之涼燥之處蓋熱則苗氣易耗穢則苗氣易雜不燥則潮濕相侵不密則鼠

蟲竊損皆所宜避遇暑月及有時疫痘症或預備堅厚竹筒烘晒乾潔納苗包於內亦好須緊塞其口庶苗氣不散疫氣不侵

苗力久暫

苗之大而厚者冬月春初可貯月餘秋末夏初猶可半月盛暑僅可六七日若更薄小焉能耐久

用苗輕重

用苗輕重在量苗之大小厚薄孩之長幼虛實時之寒煖燥濕以斟酌調劑厚大之痂兩三顆足種一孩薄小

者二三十顆不嫌多也大抵孩長而實宜加重孩幼而虛宜減輕時煖而濕宜加重時寒而燥宜減輕此其概也權衡通變在乎臨時

可種不可種

凡孩子生滿百日盱視靈動認生啼笑者即可種至十三四歲皆可種十五以上勿輕種蓋痘瘡最忌穢濁與走洩若男子情竇已開女子天癸已至能保無穢濁走洩之害乎若年長之男必須誠實自惜身命者方可下苗否則痘中走洩登時黑陷立致危殆無藥可救女之

天癸其來以漸服真阿膠可以力止猶得僥幸於萬一
然亦不可不慎揔之孩子種痘不愁太小只愁太大蓋
太大則任性自由不容大人調理大而傾危小而痼疾
何如兩三歲時不識不知任憑大人調度者之省事乎
凡孩子須看兩目瞳人深黑緊小光芒流動便是命門
充足根本深固毒雖重而無妨最忌黃淡散大呆滯無
神

再診耳尻脈在耳後高骨上并驗中指尖脈動指熱爲
相火煽動時痘將發之候不可種

凡有風寒外感飲食內傷諸症須留心調理宜緩種

凡面色痿黃毛髮焦捲皮膚枯裂者不宜種

凡氣膈木腎身有隱病者不宜種

凡頭大頸細肌肉瘦削者不宜種

凡腰細膝大肉軟如棉者不宜種

意見疑惑語言不祥者不宜種

下苗吉日

下苗宜天德歲德月德天德合歲德合月德合母倉開

成等日

避忌日辰

忌破閉滿日月忌神在日孩子本命沖尅等日

治苗塞苗法

下苗時選入鉢用杵研細加水再研入和苗丹少許以微有紅色爲度不可太多再研極和乾濕得所大約苗新宜潤苗久宜乾天寒用溫水天熱用涼水隨取木棉絮一九如豆大泡透仍挹乾先展鉢底苗漿再收杵上苗漿務必淨盡勿致狼籍然後令孩子向明用左手拈起苗丸塞入鼻孔男左女右再將乾絮豆許蓋塞苗丸

之外右手取苗杵量鼻淺深拇指指定送入鼻梁凹處
須要恰好太深則傷鼻太淺則苗丸易致脫出苗氣不
入徐疾淺深全在手法熟則生巧下苗後須防噴嚏打
出苗丸宜仍送進必過五六時方可抽出卽不抽出亦
並無妨

下苗後兩三時卽服稀痘丹五歲內三丸七歲內五丸
八九歲以上七丸不拘湯下卽入粥飯內亦可若幼不
能服者須以少熟水浸透研爛塗母乳頭令兒吮食之
務盡勿使狼籍

下苗後五日耳尻脈當動中指尖當熱七日身發熱十日佈點此一定之候也然亦時有不齊者孩體之氣稟有厚薄臟腑之傳送有遲疾肌體之腠理有疎密苗性之久新有馴暴時令之氣化有寒暑是以早者五日而發熱遲者或十二日而發熱要皆自然之理不可以一例拘也故種而不出者必俟十五日後方可覆苗纔發熱於口鼻上下兩旁先見一點平塌腫硬者爲痘標四月八月間多有之急用銀針挑破其心使出紫黯血以洩梟毒則腫硬消而餘痘易起否則壯熱困人